

Jud

Jud mij ñu kil tikak

¹Yad Jud, Jems nimam ne ak. Jisas Kraiss wög gi ñeb bi ne alap midebin. Minim ñu kil tikebin nibaul, nibep bin bi Bapi God, nibep dinigain, agil dil midmagil lip bin bi okok, ñu kil tikebin. Jisas Kraiss ne nibep kod mideb.

²God apil mal nibep yimig niñil, di tep gil, midmagil lil, gel amnañ.

Bi God Minim esek agep okok

³Bin bi niñep tep yad. Nibep mij ñu kil tikil, Jisas Kraiss cinop di komiñ yokak minim tep ak ognap agnigain, agil, gos ak niñnek. Pen yad miñi gos nipin, kiri kilis yib gil, Jisas Kraiss minim tep cinop bin bi ne ag ñak ak, niñ di kilis gilig gi midenimib, minim nibak miñi nep mij ñu kil tikil nibep yoknigain, ag gos nipin. ⁴Bi timel God ma niñal ognap kapkap apil, nibep eip mogim gipal. God ne bin bi yimig niñil, Ni ne ag yokek apil kimak ak me, bin bi tap si tap timel gipal okok, God nop ag niñel, ne tap si tap timel gipal ak niñil kirig ginigab. Pen bi timel nib okok, minim tep nibak tig adik gil apal, “Cin tap si tap timel abramek genigabin ak, God cinop pen tap alap ma ginigab,” apal. Nig gipal nibak, Bi Kib cin Jisas Kraiss nop kirig gil, gi timel yib gipal. Birarik ped okok God Minim ñu kil tikil, bin bi nig ginigal okok yur kib yib dinigal, aglak. ⁵Birarik nep gak ak nipim ak pen saköl ginimib rek lip ak me, yad nibep kauyañ agniñ gebin. God bin bi ne Isrel kai, kariñ lim Ijip nib tig asik dowak, pen kisen nop gos ma niñlak bin bi okok kirop ñag pak lek kimlak.

⁶Ejol ognap, kariñ lim tep kiri mid tep gilak okok kirig gel, God kirop kislim gip miñan ak nag lek, minim kib agep ñin kib ak kod midebal.

⁷Nib akniñ rek, Sodom Gomora abe, taun ognap kariñ lim yokop ulep nib okok abe, kiri bin si bi si gi damil, gi timel yib gelak. Bin bi mab ke per per yinnigab siñak amil, yur kib dinigal ak, bin bi okok magilsek niñlañ, agil, God ne Sodom Gomora bin bi okok kirop mab miñlañ seb kab alañ nib yokek, apil kirop yin sibok ñib amnak.

⁸Bi nigrikep niñil minim esek apal, agebin nib okok, kiri ak rek nep mib goñ kiri ke gi timel gil, Bi Kib minim ne ag juil, ejol okok kirop minim timel agil, gipal. ⁹Pen Mosis kimek, ejol kib yib Maikel eip, Seten eip, Mosis cip se ak dinig pen pen agrek ak, Maikel ne Seten nop ma ag juak. Ne yokop agak, “God ne ke nep gos ñinimiñ!” agak. ¹⁰Maikel gos niñ tep gil nib agak ak pen bi agebin okok, tap tari ma nipal okok, minim timel timel nep agil abramek ag jupal. Pen kiri, gos niñ tep ma gil, kaj kain gipal rek gipal ak me, God pen kirop yur kib yib ñinigab.

¹¹Bi nib okok kirop yimig nipin. Adam ñi ne Ken gi timel gak rek gipal. Mimig mani tap okok nep gos niñil, bi nak Belam birarik nep gak rek nep gipal. Nib ak, kiri bi nak Kora, God Minim tib juil kimak rek kimnig gebal.

¹²Pen nibi God nop midmagil lilig gi, ai mam pen pen midmagil lilig gi, tap jim ñil ñinñig apil, mogim gipim ñin ak, kiri God nop gos niñil mer, yokop apil tap kiñam di ñinñeb gi ñibel, gac kiri nibep ak rek nep cig gip. Nib ak, kimi apil miñab ma pakil yokop pak pig gi rik amib rek ak midebal. Mab ñinñeb magil ma pilek wagin sek tig ju di yokel bir pis nep milep gip rek midebal. ¹³Tap timel ke yib gi damil, ñig solwara pag jisipik masipik gil, kiñik kobkob lil piñak ap yowip rek gipal. Bin bi nib okok, God ne gek, kiri gap ju kislím nab okok amil ma adik gi apeb rek ar ak amnigal.

¹⁴Adam wagin ne tikak ak, tik damil, Inok nop me kagol oñid ak^a tik dolak. Inok ne birarik nep God minim ne agil, bi God nop esek apal bi nib okok rek niñil agak, “Niñim! Bi Kib ejol siñ ne ñin juil koñai yib nep damil, ¹⁵bin bi magilsek minim kib agnigab. Nop gos ma niñil, minim ne ageb rek ma gil, tap si tap timel ar ke ke gil, nop minim kilis timel ar ke ke agil gipal rek, kirop yur kib yib ñinigab,” agak. ¹⁶Bi minim esek apal, kirop agebin okok, kiri per ag kar kar gilig gi, minim dilig gi, gi midebal. Cin ke tep ginigab ar ak gin, agil, abramek gi timel gel ameb. Cin nep bi kib midobin, ag gos niñil, apal. Pen bin bi ognap cinop tep ginimiñ ar ak gilañ, agil, kirop yib dap raneb minim esek nep agel ameb.

¹⁷Pen bi niñep tep yad okok. Bi Kib cin Jisas Krais bi minim ne dad ameb okok ned aglak minim ak gos niñlig gi midenimib. ¹⁸Nibep aglak, “Ñin kisen ak, bin bi God nop gos ma nipal okok, gos timel kiri ke nipal rek gilig gi, nibep ag juniñal,” aglak. ¹⁹Bi agebin bi nib okok, God Kaun kirop eip ma mideb. Gos kiri ke gos apeb rek niñil gipal ak me, nibep bin bi tig asik ke ke lipal. ²⁰Pen bin bi niñep tep yad okok. Jisas Krais minim tep ak niñ dipim ak, niñ dep won siñ yib nibak niñ di kilis gil, minim tep nibak yipil ak per nep ognap sek niñ tep gil, gi damil, gem amnimiñ. Kaun Siñ ak nibep gos ñek niñlig gi, kilis ne dil nop sobok gilig

^a 1:14 Adam abe wök pagnigaun ak, Inok nop ar oñid ak tik dolak

gi midenimib. ²¹ Bi Kib cin Jisas Kraiss nibep yimig niņip ak me, ne nibep dam karip lim seb kab ar alaņ siņak lek, per per nep komiņ midenigabim. Pen am ne eip per per midon, agil, kod midebim ñin aul, God cinop midmagil lilig gi nep mideb, agil, gos ar nibak nep niņ midenimib.

²² Bin bi gos omal niņil, gos par nipal okok, kirop yimig niņil, minim sisain agnimib. ²³ Bin bi ognap mab milaņ ar ak amnimel rek lip okok, kirop di komiņ yokem, komiņ amnimel. Bin bi ognap kirop ak rek nep yimig niņil dinimib; pen midmagil kiri ke gos apeb rek gipal rek, cini ak rek nep gi timel giņin rek lip, agil, niņ tep gilig gi midenimib. Tap si tap timel kiri gipal okok pirikil, asik mosik ginimib. Tap si tap timel gi midel walij kiri abe gac gip, agil, ma dinimib.

Bi Kib yib dap raneb minim alap

²⁴ Miņi nibep God ñinmagil ar ak lebin.

Ne nibep kod midek niņlig gi, ma ap yap paknigabim.

Kisen nibep dil, ne ke melik tep ke sek mideb siņak lek,

bin bi asiņ ma mideb ne midil, miņ miņ yib ginigabim.

²⁵ God ne nokim. Ne cinop di komiņ yokip.

Bi Kib cin Jisas Kraiss cinop nen agil, kimil warikak ak, birarik ped okok tikil, mid damil,

miņi, kisen, per per nep midep nep midil,

ne Bi melik tep sek, Bi tep aknib ke,

Bi kilis timel yib, Bi magilsek kod midep mideb.

Nibak, yib ne per nep agon ar amnaņ.

Nib aknib rek tep.